

1. Mos 1, 1-5

I opphavet skapte Gud himmelen og jorda.

2 Jorda var aud og tom, mørker låg over djupet, og Guds ande svevde over vatnet. 3 Då sa Gud: «Det skal bli lys!» Og det vart lys. 4 Gud såg at lyset var godt, og Gud skilde lyset frå mørkret. 5 Gud kalla lyset dag, og mørkret kalla han natt. Og det vart kveld, og det vart morgon, første dagen.

Job 29,2-3

2 Kunne eg få det som i farne månader,
dei dagane då Gud vakta over meg,
3 då hans lampe skein over hovudet mitt
og eg gjekk gjennom mørkret i hans lys,

Job 30,26

26 Difor vona eg på det gode, men det vonde kom,
eg venta på lys, og det vart mørker.

Job 38,19

19 Kvar går vegen til bustaden for lyset,
og kvar held mørkret til?

Salme 4, 7-9

7 Mange seier:

Kven kan gje oss lukke?

Lat lyset frå ditt andlet

skina over oss, Herre!

8 Du gjev meg større glede i hjartet

enn andre får av mengder med korn og vin.

9 I fred vil eg leggja meg ned og sova.

For du, Herre, berre du

lèt meg kvila trygt.

Salme 104, 1-2

Velsign Herren, mi sjel!

Stor er du, Herre, min Gud!

Du har kledd deg i høgd og herlegdom

2 Du sveiper lyset om deg som ei kappe,
du spenner himmelen ut som ein teltduk.

Salme 119, 105

105 Ditt ord er ei lykt for min fot
og eit lys for min stig.

Ordt 29,13

13 Fattig og undertrykkjar møtest,
Herren gjev begge lys i auga.

Jesaja 60,1

Reis deg, bli lys!

For lyset ditt kjem,

Herrens herlegdom går opp over deg.

Jer 4,23

23 Eg såg jorda, og sjå! – ho var aud og tom,
mot himmelen – lyset var borte.

Matt 5, 14-16

14 De er lyset i verda! Ein by som ligg på eit fjell, kan ikkje gøymast. 15 Ingen tenner ei oljelampe og set henne under eit kar. Nei, ein set lampa på ein haldar; då lyser ho for alle i huset. 16 Slik skal lyset dykkar lysa for folk, så dei kan sjå dei gode gjerningane dykkar og prisa Far dykkar i himmelen!

Matt 6,22-23

22 Auget er kroppens lampe. Er auget ditt klårt, er det fordi kroppen er fylt av lys. 23 Men er auget ditt sjukt, er det fordi kroppen er fylt av mørker. Er no lyset i deg mørker, kor djupt blir ikkje mørkret då!

Mark 4,21-23

21 Sidan sa han til dei: «Når dei kjem inn med ei oljelampe, set dei henne då under eit kar eller under senga? Set dei ikkje lampa på ein haldar? 22 For ingenting er løynt utan at det skal bli synleg, og ingenting er gøymt utan at det skal koma for dagen. 23 Om nokon har øyre å høyra med, så høyr!»

Luk 8,16-17

16 Ingen tenner ei oljelampe og gøymmer henne under ei krukke eller set henne under ei seng; nei, han set lampa på ein haldar, så dei som kjem inn, kan sjå lyset. 17 For ingenting er løynt som ikkje skal bli synleg, og ingenting er gøymt som ikkje skal bli kjent og koma for dagen

Luk 11, 33-36

33 Ingen tenner ei oljelampe og set henne i kjellaren eller under eit kar. Nei, han set lampa på haldaren, så dei som kjem inn, kan sjå lyset.

34 Auget er kroppens lampe. Når auget ditt er friskt, er det fordi kroppen er fylt av lys. Men er auget ditt sjukt, er det fordi det er mørkt i kroppen. 35 Sjå då til at lyset i deg ikkje er mørker! 36 Er no alt i kroppen din lys og ingen del av han mørk, då blir alt lyst, som når ei lampe lyser på deg med strålane sine.»

Joh 1,1-5

I opphavet var Ordet,

Ordet var hos Gud,
og Ordet var Gud.

2 Han var i opphavet hos Gud.

3 Alt vart til ved han,
og utan han vart ikkje noko til.
Det som vart til

4 i han, var liv,
og livet var lyset for menneska.

5 Lyset skin i mørkret,
og mørkret har ikkje overvunne det.

Joh 8,12

12 Igjen tala Jesus til folket og sa: «Eg er lyset i verda. Den som følgjer meg, skal ikkje vandra i mørkret, men ha livsens lys.»

Joh 9,5

5 Så lenge eg er i verda, er eg lyset i verda.

Joh 12,35-36

35 Jesus svara: «Endå ei lita stund er lyset mellom dykk. Gå så lenge de har lyset, så ikkje mørkret skal falla på dykk. Den som går i mørkret, veit ikkje kvar han kjem av. 36 Tru på lyset så lenge de har lyset, så de kan bli born av lyset.» Då Jesus hadde sagt dette, gjekk han bort og løynde seg for dei.

Apg 12,7

7 Då med eitt stod ein engel frå Herren der, og det skein eit lys i rommet. Engelen dytta Peter i sida, vekte han og sa: «Skund deg og stå opp!» Med det same datt lenkjene av hendene hans.

Apg 13,47

47 For dette er Herrens bod til oss:

Eg har gjort deg til eit lys for folkeslag,
så du skal bera frelse til enden av verda.»

2. Kor 4,6

6 For Gud, som sa: «Lys skal stråla fram frå mørkret», han har late det skina i våre hjarte, så kunnskapen om Guds herlegdom i Jesu Kristi andlet skal lysa fram.

Ef 5, 8-14

8 Ein gong var de sjølve mørker, men no – i Herren – er de lys. Så lev som born av lyset! 9 For fruktene av lyset viser seg i alt som er godt, i rettferd og i sanning. 10 Prøv då kva som er til glede for Herren! 11 Ta ikkje del i dei gjerningane som høyrer mørkret til, for dei ber inga frukt; avslør dei heller. 12 Det som slike folk driv med i løynd, er det ei skam berre å nemna. 13 Men alt kjem for dagen når lyset får avsløra det, 14 og alt som kjem for dagen, er lys. Difor heiter det:

Vakna, du som søv,
stå opp frå dei døde,
og Kristus skal lysa for deg.

1.Joh 1,5-7

Gud er lys; i han finst det ikkje mørker. 6 Seier vi at vi har fellesskap med han, men vandrar i mørkret, då lyg vi og følgjer ikkje sanninga. 7 Men dersom vi vandrar i lyset, liksom han er i lyset, då har vi fellesskap med kvarandre, og blodet frå Jesus, hans Son, reinsar oss for all synd.